

瑜伽師地論

科句披尋記

彙編

卷第一

彌勒菩薩說唐三藏沙門玄奘奉詔譯

韓清淨科記 三時學會彙編

瑜伽師地論披尋記，爲近代唯識學者韓清淨居士所著。全書七十萬言，闡發大論奧義，性相該攝，義解精詳，萬象包羅。本刊特爲連載，以供潛心研究唯識學者之參考。——編者

本地分

本地分者：畧說此論，總有五分。瑜伽師地論釋云：一、本地分，畧廣分別十七地義。二、攝決擇分，畧攝決擇十七地中深隱要義。三、攝釋分，畧攝解釋諸經儀則。四、攝異門分，畧攝經中所有諸法名義差別。五、攝事分，畧攝三藏衆要事義。今依最初本地分中所顯十七地義，隨文畧釋。當知此中教導理趣，應是分別法相摩怛理迦所攝；爲瑜伽師之所依止。望餘四分此爲根本；得本地名。餘明所攝，畧攝一切，解釋此故。

甲一本地分二

乙一畧辨地名二

丙一徵

云何瑜伽師地？

丙二辨三

丁一標

謂十七地。

丁二徵

何等十七？

丁三列二

戊一喩柁南

喩柁南曰：

喩柁南者：此云集施。以少畧言集合多法，施諸學者令易受持；故名集施。此從瑜伽畧纂釋名。

五識相應意 有尋伺等三 三摩地俱非 有心無心地 聞思修所立 如是具三乘 有依及無依 是名十七地

三摩地俱非者：三摩地名，此云等持，通說欲界及在定地諸心心所，今此唯顯定地心一境性，任運相續無散亂轉，名三摩地。於

定地中有多差別相應而轉。謂得三摩地，三摩地圓滿，三摩地自在。是故名俱。與此相違，非三摩地。下長行中說三摩地多，非三摩地多地名雖有別，義實無異。三摩地多，此云等引。唯說定心，是無悔歡喜安樂所引故。爲簡欲界諸心所，故易此名。

聞思修所立，如是具三乘者：立，謂成立。謂由多聞思修，善自成立諸勝解相。聲聞獨覺及諸菩薩，皆依此三爲正方便，方能證得自應得義；由是故說聞思修所立如是具三乘。然復當知此如是言，唯顯聞思修相方便決定；非三乘中都無差別。下自地中隨應廣說，其義當知。

戊二長行

一者，五識身相應地。二者，意地。三者，有尋有伺地。四者，無尋唯伺地。五者，無尋無伺地。六者，三摩地多。七者，非三摩地多。八者，有心地。九者，無心地。十者，聞所成地。十一者，思所成地。十二者，修所成地。十三者，聲聞地。十四者，獨覺地。十五者，菩薩地。十六者，有餘依地。十七者，無餘依地。如是略說十七，名爲瑜伽師地。

一者五識身相應地等者：至文當釋，茲不先述。

乙二別廣地攝十四

丙一五識身相應地二

丁一徵

本地分中五識身相應地第一云何五識身相應地。

五識身相應地者：如下自釋總有五種說名相應。謂自性、所依、所緣、助伴、作業。當知此中俱有而轉，是相應義。若法自性可得，及與餘法同時流轉有諸業用，如是一切總名相應。與此相違，名不相應。如假有法，唯假有想，都無自性所依所緣助伴作業

可得。是故名心不相應法。此相應義，翻釋應知。

丁二釋二

戊一畧辨二

己一名相應地

謂五識身自性、彼所依、彼所緣、彼助伴、彼作業、如是總名五識身相應地。

己二名五識身

何等名爲五識身耶？所謂眼識、耳識、鼻識、舌識、身識。

戊二廣顯二

己一別辨五相五

庚一眼識攝五

辛一自性

云何眼識自性？謂依眼，了別色。

謂依眼了別色者：此釋眼識自性得名。眼根爲依；故名爲眼。能了別色；復名爲識。簡餘不共，說此自相名爲自性。

辛二所依二

壬一別舉三依三

癸一俱有依

彼所依者：俱有依、謂眼。

癸二等無間依

等無間依，謂意。

癸三種子依

種子依，謂即此一切種子執受所依異熟所攝阿賴耶識。

彼所依者等者：此中總說眼識有三所依。一、俱有依。謂眼。由與眼識俱時流轉；能與眼識爲增上緣。爲顯損益共同，此依最勝；不共餘識，名俱有依。所以者何？於異熟中，眼根相續恆無間斷。由此義故，成爲所依。即此爲依，眼識得生；眼若壞時，眼識不起。由是應知此與眼識損益共同，成俱有依。二等無間依。謂意。此即眼識無間滅者，名之爲意。即過去識之異名。由前剎那眼識滅已，後自類識無間得生；是故名爲等無間依。前後自類諸心心所，有善不善無記等種種差別無間滅生。謂善心無間滅，或善心生，或不善心生，或無記心生。如是不善無記心無間滅，各有三種心生，當知亦爾。諸餘差別，繁不具述。以要言之，前自類識種種差別纔生滅已，中無間隔後自類識種種差別相續而

生；前後諸心或爲同分，或爲異分，非一類起，非有間起，非俱時起，依此安立等無間名。三種子依。謂即此一切種子執受所依異熟所攝阿賴耶識。攝大乘論說有頌言：由攝藏諸法一切種子識，故名阿賴耶；勝者我開示。由是當知阿賴耶義是攝藏義。長行釋云：一切有生雜染品法，於此攝藏爲果性故。又即此識於彼攝藏爲因性故。是故說名阿賴耶識。或諸有情攝藏此識爲自我故。是故說名阿賴耶識。今於此中說種子依體即阿賴耶識。爲顯此識，能與眼識爲其生因；是故說言一切種子。此即攝大乘論說於彼攝藏爲因性義。又顯此識受彼眼識雜染熏習，能持彼種是故說言執受所依異熟所攝。此即攝大乘說於此攝藏爲果性義。由是當知此種子法，望生現行說名爲因；望由熏習轉說名果。如是因果，皆依阿賴耶識而得建立；是故阿賴耶識名種子依。如說眼識，所餘諸識，道理亦爾。隨其所應。下皆準知。復次阿賴耶識與能熏法同時同處不即不離；成是所熏。是故說言執受所依。執受諸根和合轉故。又性堅住，一類相續，能持習氣；唯是無記，無所違逆，能容習氣。具此二義，成是所熏。是故說言異熟所攝。唯先業引任運起故。

壬二畧釋二依二

癸一標列

如是畧說二種所依。謂色，非色。

癸二隨釋二

子一辨類

眼、是色。餘，非色。

如是畧說二種所依等者：前說所依，具有三種；今攝彼類，故略說二。一、色所攝，二、非色所攝。如五蘊中，初蘊色攝；餘非色攝。此亦如是。於所依中，眼爲俱有依，色蘊所攝；意爲等無間依，阿賴耶識爲種子依，皆非色蘊所攝。由是故說眼是色；餘非色。爲顯有色無色法類差別；是故畧說二種所依。

子二出體二

丑一眼

眼，謂四大種所造眼識所依淨色，無見有對。

眼謂四大種所造眼識所依淨色無見有對者：眼是其名，色是其體。眼名云何？屢觀衆色，觀而復捨，故名爲眼，如下意地釋。（陵本三卷十五頁）色體云何？當知眼根爲彼所攝。此有多別，爲

顯界攝，是故說言四大種所造。地水火風，名四大種；色香味觸及與身眼名此所造。爲顯相攝，是故說言眼識所依淨色。皆如決擇分說。（陵本五十四卷八頁）爲顯類攝，是故說言無見有對。亦如決擇分釋。（陵本六十五卷九頁）

丑二意

意，謂眼識無間過去識。

意謂眼識無間過去識者：謂此剎那眼識現行，於所行境有所了別，是名爲識。若謝滅已無所了別，應不名識。唯可假說名過去識。然由中無間隔，不障現識相續而生；此過去識，轉名爲意。能與現識爲依止故。即依此義，得此意名。

丑三一切種子識

一切種子識，謂無始時來樂著戲論熏習爲因所生一切種子異熟識。一切種子識等者：此釋前說種子所依。當知即是阿賴耶識。非離阿賴耶識別有一切種子識。前後二文，或廣或畧；更互影顯，義乃圓滿。前文唯說一切種子，而未具言彼種子因；此文唯說是異熟識，而未具言執受所依。由此二文前後影顯，成種子依；義得圓滿。雖有釋言阿賴耶識非即種子識，然非此意。以此唯釋種子依故。攝大乘釋阿賴耶識，依攝藏義，顯因果別：亦依種子差別說故。由是當知此一切種子識，即是前說阿賴耶識。約阿賴耶識位說，名異熟識，說名一切種子識，於教於理無相違失。復次阿賴耶識，先業所引變異成熟；隨所生處，於自體中能持三界餘體種子。由是說言一切種子異熟識。此一切種，且說有漏；不說無漏。是故更說無始時來戲論熏習爲其生因。云何戲論？謂執我者三際俱行，謂我爲有或謂爲無。又於諸法執有實性，或謂爲異，或謂不異。如是語言，皆由不正思惟虛妄分別之所發起；能引無義，不能引義。是故說彼名爲戲論，如是戲論，無始時來愛樂味著，故名樂著。長時串習；故名熏習。依此熏習，彼種得生。是即所謂名言種子。言異熟者：由業現行，彼種得生；彼種生已漸次變異乃至成熟，是即所謂業種子。由此名言及業種子，於現法中能生現行；現行生已，還熏彼種。如是展轉更互爲因，成就流轉不息道理。爲顯此義，是故說言一切種子異熟識。

辛三所緣二

壬一出體

彼所緣者：謂色，有見有對。

謂色有見有對者：此中有見，由五種相建立差別。謂顯色故；形色故；表色故；眼境界故；眼識所緣故；有對，亦由五相建立差別。一、各據別處而安住故；二、於餘色聚容受往來等業爲障礙故；三、爲手足塊刀杖所觸便變壞故；四、一切皆爲諸清淨色之所取故；五、一切皆爲依清淨色識所緣故。如下決擇合釋。（陵本六十五卷九頁）

壬二辨類二

癸一標多種

此復多種。

癸二畧攝三二

子一顯形等三二

丑一標列

略說有三：謂顯色，形色，表色。

謂顯色形色表等者：如文自釋，畧有三義。第一義，出體性，第二義，明安立，第三義，顯差別。隨文可知。

丑二隨釋二

寅一別辨相三

卯一第一義三

辰一顯色一

辰二形色

顯色者，謂青黃赤白光影明暗雲煙塵霧及空一顯色。

辰二表色

表色者，謂取捨屈伸行住坐臥，如是等色。

空一顯色者：謂世間成時，諸有清淨第一最勝精妙性者，成蘇迷盧山。此山成已，四寶爲體。所謂金銀頗胝琉璃，繞蘇迷盧成七金山及四大洲，謂南瞻部洲，東毘提訶洲，西矍陀尼洲，北拘盧洲。如是四洲面蘇迷盧；隨一空實色顯現。如瞻部洲上所見色，即琉璃寶之所顯現。餘隨所應，當知亦爾。由是故名空一顯色。

未完待續